

Nua va Moutier?

Vul ins spustar in cunfin interchantunal?

DA GUIU SOBIELA-CAANITZ

■ **Ils dus suverans han decis. Il pievel dal chantun Giura salva quest cun 76,6% da las vuschs, quel dal circul («arrondissement administratif») dal Giura bernais salva l'existenza da lez cun 71,85%. L'existenza, geabain, dentant mo ina part da l'intschess. La differenza ha num Moutier, in lieu da mo 7466 olmas e tuttina il principal dal circul. Moutier è l'unica vischnanca bernaisa che ha ditg «gea» al chantun Giura, e quai cun 55,4% da las vuschs.** Ella dastga uss instradar ina procedura da secessiun da Berna per lur inoltrar ina dumonda da recepziun en il chantun Giura. Quai tuna fitg simpel. Ma in sguard sin la charta geografica da la Prévôté, pia la vallada da Moutier tranter las chadainas dal Giura, mussa che la «ville» è circumdada d'ina curuna da sis «villages»*; tschintg d'els han ditg «gea» a Berna, mo in, Belprahon, ha vuschà 110 cunter 110 (sic!). La gasetta «Le Courrier» (Genevra) dals 26 da november commentescha: «Oravant tut èsi impurtant per Moutier da far tut il pussaivel per persvader las sis vischnancas limitrofas. Sche mo Moutier midass chantun, lura perdess l'entira Prévôté ses equiliber. Vitgs da la 'curuna' vegnissan enclavas bernaisas aifer ils cunfins dal Giura (...). En fatscha ad ina situaziun nova pudessan lezs vitgs reponderar lur tenuta. Da quest puntg da vista èsi meglier che Moutier sa decidia l'emprim; sche lezza vischnanca tscherna puspè il chantun Giura, lura resguardassan tschellas la situaziun meglier per sa decider sezzas. L'anterieur cusseglier dals stadis Dick Marty, parsura da l'Assamblea intergiurassiana, ha menziunà ils 24 november la pussaivladad d'ina tala sequenza da votaziuns. Quai recumonda era Pascal Mahon, docent da dretg costituziunal a l'Universitad da Neuchâtel (...). Maxime Zuber, president communal da Moutier,



Moutier è l'unica vischnanca bernaisa che ha ditg «gea» al chantun Giura, e quai cun 55,4% da las vuschs.

patratga ad ina sentupada furmala en l'emprima mesadad da 2014 cun las autoritads da las vischnancas da la 'curuna', cun duas tractandas: Cooperaziun ed eventualmain project da fusiun, lur il futur instituziunal da la Prévôté (...). Plis presidents communsals èn sa declarads averts per dialogar.»

Conferma la vischnanca ses «na» a Berna?

Co va quai vinavant? La «NZZ» dals 28 da november 2013 commentescha: «Necessari è l'accord dal cussegl grond. Pussai fissa er in'iniziativa populara per impedir ina midada da chantun (...). Senza Moutier vegniss il Giura bernais pli flai-

vel (...). Gia ussa sa chatta'l en ina situaziun greva. Dapi 2011 èsi l'emprima giada ch'il Giura bernais n'è betg pli representant en il cussegl naziunal; i na dat gnanc in cusseglier naziunal bernais da derivanza francofona (...). Da l'autra vart n'èsi tuttina betg segir che la vischnanca da Moutier sa decidess per il Giura sch'ella fiss suletta latiers (...). Jean-Pierre Graber, anteriur cuss. naz. dal Giura bernais, (...) fa endament l'ospital e las autoritads localas: 'I sa tractass era da plazzas da lavur.' A Moutier è situà in dals dus ospitals dal circul. Il Giura bernais dumbrava 51 539 olmas il 2010; senza Moutier dessi mo pli 44 073. Lezza secessiun indebliss era la

francofonia bernaisa, la quala cumpiglia anc las vischnancas bilinguas da Bienna ed Evillard/Leubringen (cun Macolin/Magglingen). Da l'autra vart dov'ins mo 10 minutas cun il tren per ir da Moutier à Delémont, chapitala dal chantun Giura; da Moutier à Bienna, sur Grenchen/SO, èsi 18 minutas, lura vegnan anc 25 enfin a Berna. Oz munta la mobilitad adina dapli, ed il chantun Giura è sa verifitgà plainamain dapi sia naschientscha da Bumaun 1979. Ils onns 2014 e 2015 vegnan en mintga cas a marinar tensiun en la «question jurassienne».

* Nums e populaziuns communalas: Belprahon (300), Champoz (157), Court (1352), Eschert (378), Perrefitte (479), Roches (225).